

KONTROL MOZIOA

EKIALDEKO BARRUTIAK BEHAR DITUEN ALDAKETAK DIRELA ETA

EH Bildu udal taldeko zinegotzi Zigor Etxeburua Urbizuk mozio hau aurkezten du Udalbatzaren Organo Araudiko 98. artikulua oinarri hartuta, Udalbatzan azter dadin. Mozioaren oinarria 2023ko martxoaren 24an Zerbitzu Orokorraren Batzordean aztertutako interpelazioan dago.

JUSTIFIKAZIOA

Amaitzear den agintaldi honen hasieran, 2019ko urrian, Politika Orokorrari buruzko Ohiz kanpoko Udalbatzarrean, EH Bilduk proposatutako ebazpenak eskatu zion Udal Gobernuari Ekialdeko Barrutiaren jarduera nabarmen indartzeko, parte hartze eta ekitate irizpideak oinarri hartua, egitura horren garapen eta eraginkortasun osoa lortzeko, lehenbailehen; ebazpena aurrera atera zen EH BILDU, PSE-EE eta ELKARREKIN DONOSTIA taldeen aldeketasunarekin.

Ekialdeko Barrutia eritzeak esperantza berri bat piztu zuen bertako bizilagunongan, argi baitugu egokiago gobernatuko dugula geure burua geure beharrei eta arazoei irtenbideak bertatik bertara emanda. Baina ez da lortu Barrutiak garapen azkar eta eraginkor bat izaterik gabezia nabarmenak baititu: egungo funtzionamendua ez da operatiboa izaten ari, batetik, alkateak uko egin diolako eskuduntzak delegatzeari (erabakiak hartzeko ahalmena), horretarako aukera duen arren, Udaleko Idazkari Nagusiak 2022ko urtarrilaren 17ko txostenean adierazi bezala; bestetik, Udaleko organo zentralak urruntasun handia erakutsi dutelako Barrutiarekiko, hainbat arduradunek, baita alkateak ere, aitortu bezala; eta ezin duelako bere jarduera zuzenean kudeatu, ez baitauka langilerik, administrazio unitatea duen arren. Horien guztien ondorioz, abiatu zenetik ez da osorik exekutatu Barrutiaren aurrekontu bat bera ere.

Batzarreko elkarteek ezinegona adierazi izan dute aipatu horiengatik, eta kezka horrekin bat eginik, EH Bilduk hainbat ekimen bideratu ditu Barrutiak garapen eta eraginkortasun osoa lortzeko, lehenbailehen; hala nola: Organo Araudia aldatzea, Udaleko ordezkariak orekatuagoa izan zedin (onartua); Ekialdeko Barrutiaren mugakide diren udalerriekiko gaietarako batzorde ez iraunkorra sortzea; Ekialdeko Barrutiaren 2021eko eta ondorengo urteetako aurrekontuak modu eraginkorragoan kudeatzea (onartua); eskuduntzen inguruko lege txostena eskatzea Idazkariari (onartua); Kultura, euskara, osasuna eta gizarte gaien lantaldea antolatzea (onartua).

Lau urte horien buruan, ordea, adierazi behar dugu Ekialdeko Barrutiaren jarduerako lau urteok nahi eta ezin baten kronika izan direla, besteren artean funtzionamendua ez delako operatiboa izan, Udaleko organo zentralak ez dutelako aintzat hartu, eta ez duelako izan esleitu zaion aurrekontua zuzenean kudeatzeko ahalmenik. Horregatik, udal batzordean, EH Bilduk honako galdera hauek egin zizkion alkateari: zergatik ez duen delegatu eskumenik Ekialdeko Barrutiaren gain, zer dela-eta ez dion lan talde teknikorik esleitu eta zergatik ez dion arreta handiagoa eskaini Barrutiari, dituen funtzionamendu arazoak eta gabezia estrukturalen aurrean, irtenbideak bilatzeko eta jarduera eraginkorrago lortzeko. Gobernuaren izenean hitza hartu zuen zinegotziak ez zion lehen galderari erantzun. Bigarrenari erantzun zion Parte hartzeko Saileko bi langilez gain, Udaleko langile guztiak daudela Barrutiaren zerbitzura. Azkenari dagokionez, hasieran ukatu egin bazuen ere esanaz sail

EH Bildu talde politikoa

Grupo político EH Bildu

Ijentea, 1 - 20003 Donostia
Tel. 943481027 eh_bildu@donostia.eus-- www.donostia.ehbildu.eus

askotan geratzen direla egin gabe proiektu ugari, onartu zuen Ekialdeko Barrutiak egiturazko arazoak dituela.

EH Bilduko kideok uste osoa dugu Barrutia tresna egokia izan daitekeela bertako bizilagunontzat, baldin eta aldaketa esanguratsuak egiten bazaizkio, hala nola erabakitzeo ahalmena ematea, langile taldea esleitzea, baliabide ekonomikoak handitzea eta komunikazio lan egokia egitea.

Horiek horrela, behean sinatzen duen zinegotziak honako KONTROL MOZIO hau egiten du:

1. Donostiako Udaltzarak hertsatuki eskatzen dio Udal Gobernuari egin dezala txosten bat (memoria) Ekialdeko Barrutiak sorreratik agintaldi honen amaierara arte izan duen jarduera bilduko duena, eta zerrenda ditzala txostenean aurrekontu bakoitzean jasotako ekintzak, horien exekuzio egoerak eta likidazioak, baita Barrutiarekin harremana izan duten udal sailtako teknikarien ikuspegiak ere.
2. Donostiako Udaltzarak hertsatuki eskatzen dio alkateari azal diezaiola Ekialdeko Barrutiko Batzarrari, idatzi baten bidez, zergatik ez duen delegatu nahi izan eskumenik Ekialdeko Barrutiaren gain.

Donostian, 2023ko apirilaren 28an.

Zigor Etxeburua Urbizu
EH Bildu udal taldeko zinegotzia